

Davy ta logra mehora su temponan den World Cup di Natacion

AZB hopi satisfecho cu e logro aki

ORANJESTAD(AAN) - Manera cu a raporta caba, un delegacion di Arubaanse Zwembond, consistiendo di landadornan Davy Bisslik y Roshendra Vrolijk, entrenador Brian Bishop y delegado Roly Bisslik, ta na Stockholm, Suecia pa participa den e "Swimming World Cup", un evento di nivel mundial cu ta wordo organisa bao auspicio di e Federacion Internacional di Natacion Amateur (FINA). E Swimming World Cup ta wordo landa den un piscina corto, di 25 meter, loke ta brinda competencia masha spectacular y atractivo pa e publico tambe.

AZB a ricibi noticia di e delegacion cu tanto Davy como Roshendra tabata tin un bon actuacion durante e World Cup, cu ta conta cu participacion di un total di 32 pais, manera Algeria, Australia, Brazil, China, Gran Bretania, Spania, USA, e pais anfitrión Suecia y Aruba.

Pa Aruba e participacion ta forma parti di un plan di preparacion pa Weganan Olimpico di Atenas 2004 y tabata tin como meta pa duna Davy Bisslik y Roshendra Vrolijk experiencia competitivo cu un deportista tin mester di dje asina tanto.

Informenan for di Stockholm ta muestra cu Davy a logra un adelanto importante riba tur e distancianan cu ela landa, loke ta muestra cu e entrenamiento na New Jersey ta dunando bon resultado.

Algun di e resultadonan preliminar di Davy ta como lo siguiente:

Riba 100 meter Butterfly su tempo anterior tabata 59.22 seconde, awor ela logra mehora esaki te na un tempo di 58.37 seconde.

Riba 50 meter Backstroke su tempo tabata 30.26 seconde, awor ela landa 29.15 seconde.

Su 50 meter Freestyle e tempo anteriormente tabata 25.05 seconde, mientras

na Suecia Davy a logra mehora e tempo aki te na 24.58 seconde.

Den e dianan nos dilanti AZB lo presenta mas resultado di e Swimming World Cup na Stockholm.

Un palabra di pabien na e delegacion Arubano cu nan bon actuacion!